



Hans Amacker (san.), il director da la Viafier retica e Lorenzo Schmid, il president communal d'Arosa.

FOTOS SWISS-IMAGE

«L'onn dal tschientaner per Arosa»

Viafier retica: 100 onns Cuir–Arosa

DA GION NUTEGN STGIER / ANR

■ **Cun occurrenzas da tut gener è vegnì festivà a Cuir ed Arosa l'anniversari da 100 onns dapi che la Viafier retica curescha tranter quels dus lieus. Exact per il giubileum è er vegnida surdada al manaschi la nova staziun d'Arosa. Per realisar quella èn vegnids investads 24,4 milliuns francs.** Ils 12 da december 1914 è cursà l'emprim tren tranter Cuir ed Arosa ed exact 100 onns pli tard ha la Viafier retica envità vegl e giuven a la festa da giubileum. Da venderdi fin dumengia saira è vegnì festivà l'anniversari radund e quai redaivel. Sco adina sche la Viafier retica envida ad ina festa da giubileum è l'interess per quel, er la davosa fin d'emna, stà ordvart grond. En il center da las occurrenzas è bain stà il giubileum tschientaner, dentant er l'avertura da la nova staziun d'Arosa. Cumenà han las festivtads venderdi per ils giasts envidads da la politica, da l'economia e dal turissem e sonda e dumengia ha lura gì lieu la festa da giubileum publica.

La carta da visita d'Arosa

Quai che pertutga las frequenzas tutga la staziun d'Arosa en il Grischun tar las top

diesch, pero da gronda impurtanza è quella lura er per il traffic da martganzia. Per Arosa sco ina da las destinaziuns da vacanzas principalas en noss chantun è la staziun la carta da visita dal lieu. Cun la sanaziun da la staziun e cun la colliaziun directa tar la pendiculara «Weisshorn» dispona il lieu uss d'in object modern, cumplex, che correspunda als giavischs dals passagiers e tenor il basegns da persunas cun impediments, ha ditg *Hans Amacker*, il director da la Viafier retica. Ultra da quai saja la staziun confortabla ed er opticamain insatge per l'egl.

La sanaziun ha cuzzà dus onns

Per la sanaziun da la staziun d'Arosa ha la Viafier retica investà 24,4 milliuns francs. Cuzzà ha la sanaziun da la staziun dus onns e vitiers è er vegnì engrondì il sutterràn da locomotivas, uschia ch'ils trens Allegra han plaz en quel. Sanadas, amplifitgadas e cunzunt fatgas pli empernaivlas èn er vegnidas las zonas dals passagiers, las zonas da spetga e retschet in nov vestgì han lura er ils spurtegl. Ils indrezs tecnics èn natiralmain er vegnids modernisads, uschia ch'els èn da preschent sin il pli nov stadi. La nova illuminaziun da la staziun dat a l'entir object

lura er in agen maletg. Grazia a la nova halla stat uss a disposiziun in local adattà per deponer bavrondas, victualias ed autra rauba che vegn transportada adina dapli cun la viafier. In object da parada è lura er la nova passarella da la staziun ch'è er vegnida surdada uffizialmain al travagl ils dis da las festivtads.

Paucs lieus turistics cun quella purschida

Sa mussà ventiraivel da la sanaziun da la staziun è lura er *Lorenzo Schmid*, il president d'Arosa. Per il lieu giaja a fin l'onn dal tschientaner cun la realisaziun da la colliaziun dals territoris da skis da Lai ed Arosa e cun la sanaziun cumpletta da la staziun d'Arosa, ha ditg «Lolo» Schmid. El ha er engrazià al chantun, a la vischnanca ed a las pendicularas per lur su tegn dad 1,3 milliuns per la realisaziun da la passarella. *Philipp Holenstein*, il director d'Arosa Pendicularas SA, ha ditg che sin l'entir mund hajan paucs lieus turistics la staziun amez il vitg cun ina colliaziun directa tar las pendicularas. Per il travagl saja l'avertura da quella colliaziun tranter la staziun e la staziun da val da las pendicularas in ulteriur punct culminant èn sia istorgia.



L'object da parada da la staziun d'Arosa è la nova passarella.



Sa drizzà a la raspada da festa è er Stefan Engler, il president dal cussegl d'administraziun da la Viafier retica.



Quai ha er fatg Urs Marti, il president da la citad da Cuir.



In viadi cun la charrotscha da posta è er stà sin il program per ils giasts d'onur.



In giu da hockey tranter ils anteriurs stars dal Club da hockey Arosa ed ils emploiads da la Viafier retica ha er betg mancà.



La viafier Cuir–Arosa tutga er tar il maletg da la chapitala grischuna.